

## Evening Dogri News Bulletin, 10<sup>th</sup> September 2024

इवनिंग डोगरी न्यूज़ बुलेटिन

समे .1815

खास-खास खबरें

<><><><><><>

### Headlines

- 1 बीएसएफ जम्मू फ्रंटियर दे आईजी डी.के.बूरा होरें आखेआ जे बन्ने पूरी चाल्ली सुरक्षत न ते आतंकवादिएं गी जम्मू कश्मीर च होने आले विधानसभा चुनाएं च खलल नेई पान दित्ता जाग।
- 2 भारत नै संयुक्त राष्ट्र दी स्थाई सदस्यता गी सारे प्रतिनिधिएं आस्तै होर मता असरदार बनाने दा आह्वान कीता।
- 3 केन्द्रीय गृहमंत्री अमित शाह होरें साइबर सुरक्षा गी राष्ट्रीय सुरक्षा दा इक अनट्रुट हिस्सा दस्सेआ। उनें आखेआ जे केन्द्र दी साइबर अपराध कन्नै निबड़ने आस्तै अगले 5 ब'रे च 5 जहार साइबर कमांडो गी सिखलाई देने दी योजना ऐ।
- 4 टोल प्लाजा पर जीएनएसएस प्रणाली आली गड़िडएं आस्तै बक्खरी लेन होग।

<><><><><><>

### BSF Borders(byte)

बीएसएफ दे अधिकारी नै आखेआ ऐ जे जम्मू कश्मीर दे विधानसभा चुनाएं च आतंकवादी कुसै बी चाल्ली दा बिघ्न नेई पाई सकनख एहदे आस्तै बन्ने पर घुसपैठ रोधी तंत्र ते तरीकाकार अपनाएं गे न तां जे बन्ने पारां थमां कुसै बी चाल्ली दी घुसपैठ नेई होई सकै। सीमा सुरक्षा बल जम्मू फ्रंटियर दे आईजी डी.के.बूरा होरें डोडा जिले दे भद्रवाह इलाके च संवाददाताएं कन्नै गल्ल करदे करा'रदे हे। एह जिला उनें 6 होर जिलें च शामिल ऐ जित्थें पैहले गेड़ तैहत 19 सितम्बर गी वोट पाए जाने न।

बन्ने बारे गल्ल करदे होई उनें आखेआ जे बन्ने पूरी चाल्ली सुरक्षत न। बीएसएफ होर दूई सरबन्धी अजेंसिएं कन्नै रलियै कम्म करा'रदी ऐ ते घुसपैठ रोधी सारे तरीकाकार अपनाएं गे न।

<><><><><><>

## UNSC India

भारत नै संयुक्त राष्ट्र गी स्थाई सदस्यता गी खास तौरा उप्पर अफ्रीका दी भागीदारी चा मते प्रतिनिधि बनाने लेई आखेआ ऐ। भारत नै आखेआ ऐ जे सुरक्षा परिषद च राजनीतिक मतभेद, शांति अभियानें गी प्रभावत करा'रदे न। सुरक्षा परिषद च अपना संबोधन दिंदे होई संयुक्त राष्ट्र च भारत दे नमें बने दे स्थाई प्रतिनिधि पी.हरीश होरें आखेआ जे सुरक्षा परिषद च राजनीतिक तालमेल दी कमी ऐ। इस कारण संयुक्त राष्ट्र ते शांति अभियानें उप्पर प्रभाव पेआ ऐ। शांति अभियानें गी मजबूत करने बारे बोलदे होई हरीश होरें आखेआ जे भारत शांति अभियान च सारे शा बड्डा योगदान दिंदा ऐ। भारत नै पिछले 7 दहाकें च 50 शा मते मिशनें च अपने केई सैनिक बलें गी भेजेआ ऐ।



## PM-Anusandhan

प्रधानमंत्री नरेन्द्र मोदी होर नमीं दिल्ली च नमें सिरेया बनी दी अनुसंधान राष्ट्री शोध फाउंडेशन दी पैहली गवर्निंग बोर्ड दी बैठक दी अध्यक्षता करा'रदे न। इस बैठक च शिक्षा मंत्री धर्मेन्द्र प्रधान ते वरिष्ठ अधिकारी बी मजूद न। एएनआरएफ दी स्थापना राष्ट्री शिक्षा नीति 2020 यानि नैशनल एजुकेशन पॉलिसी 2020 दी सिफारश उप्पर कीती गई ही। एहदा मकसद पूरे देसै दिएं यूनिवर्सिटिएं, कालेजें, शोध संथानें ते अनुसंधानें ते विकास प्रयोगशालाएं च शोध ते नमिएं काहडें दी संस्कृति गी बढ़ावा देना ऐ। अनुसंधान राष्ट्री शोध फाउंडेशन देसै च वैज्ञानिक शोध गी उच्च स्तर दी दिशा देने लेई इक शीर्ष निकाय दे रूपा च कम्म करा'रदी ऐ।



## EAM-Jaishankar

विदेश मंत्री डॉ. एस.जयशंकर होर अज्ज थमां जर्मनी दे दऊं दिनें दे दौरे पर जांगन। डॉ. जयशंकर होर बर्लिन च जर्मनी दे विदेश मंत्री ते होरने मुख् नेताएं कन्नै मिलियै दपक्खी गल्लबात करगंन। विदेश मंत्री हुंदी इस यात्रा करी अगले म्हीने जर्मनी दे चांसलर ओलफ शाक्स हुंदी भारत दी प्रस्तावित यात्रा दी नीह् तैआर कीती जा'रदी ऐ। साढे संवाददाता दी रिपोर्ट मूजब जर्मनी भारत दे मते महत्वै आले बपारिक सांझेदार च शामिल ऐ ते विदेशी निवेश दा इक प्रमुख स्रोत दे तौरा उप्पर खेड़ोते दा ऐ। इस थमां पैहले कल डॉ. जयशंकर होरें रियाद च रणनीतिक संवाद लेई इंडिया गल्फ कारपोरेशन काउंसल दे उद्घाटन च सह-अध्यक्षता कीती।



## Shah-14 C

केन्द्री गृहमंत्री अमित शाह होरें अज्ज साइबर सुरक्षा गी राश्ट्री सुरक्षा दा इक अभिन्न हिस्सा दस्सेआ। उनें आखेआ जे केन्द्र दी साइबर अपराध कन्नै निबड़ने लेई अगले 5 ब'रें च 5 ज्हार साइबर कमांडों गी सिखलाई देने दी योजना ऐ। शाह होरें एह गल्ल नमीं दिल्ली च भारती साइबर अपराध समन्वय केन्द्र दे पैहले स्थापना दिन समारोह गी संबोधत करदे होई आक्खी। उनें आखेआ जे देसै दी प्रगति साइबर सुरक्षा दे बगैर संभव नेई ऐ। अमित शाह होरें सारे हितधारकें गी इस खतरे कन्नै निबड़ने लेई इक मुट्ठ होने लेई आखेआ। शाह होरें गलाया जे हुन मसां जेहड़े त्रै नमें अपराधिक कनून बने न, ओ देसै दे साइबर अपराध कन्नै सरबंधत चुनौतिएं कन्नै निबड़ने लेई पर्याप्त प्रावधान रखदे न। संदिग्ध पंजीकरण दी आई4सी पैहल लेई श्री शाह होरें आखेआ ऐ जे राश्ट्री स्तर दा साइबर संदिग्ध पंजीकरण भविक्ख च अपराधें गी रोकने लेई मदद करोग। उनें एह बी आखेआ जे आई4सी साइबर सुरखा उप्पर राश्ट्री स्तरीय जागरूकता अभियान शुरू करदा ऐ। केन्द्री गृहमंत्री होरें अज्ज नमीं दिल्ली च साइबर अपराध दे संरक्षण दी मुख्य पैहल ते देसै गी समर्पित साइबर धोखाधड़ी न्यूनीकरण केन्द्र दा शुभारंभ कीता। इंदे च वेब आधारित मॉडल समन्वय, शेरिंग, मैपिंग ते एनालिटिक्स ते प्रवर्तन अर्जेसिएं लेई इक समन्वय टूल शामिल न। शाह होरें साइबर सुरक्षा बधाने लेई राज्यें ते केन्द्र शासत प्रदेशें च सरबंधी माहिरें दा दक विंग स्थापत करने सरबंधी साइबर कमांडो कार्यक्रम ते केन्द्र पुलस संगठन दा बी शुभारंभ कीता।



## Green Steel Report

स्टील ते भारी उद्योगें दे मंत्री एच.डी.कुमारस्वामी होरें आखेआ ऐ जे लगातार ते टिकाऊपन ते स्थापित्व हुन इक विकल्प नेई ऐ सगुआं धरती दे कल्याण लेई अत्त जरूरी ऐ। ग्रीन स्टील रिपोर्ट दी शुरूआत करदे मौके इक समारोह गी संबोधत करदे होई कुमारस्वामी होरें आखेआ जे स्टील जनेह इक क्षेत्र दी पर्यावरण पर व्यापक असर पौंदा ऐ। कुमारस्वामी होरें ग्रीन स्टील:—स्थायित्व आस्तै बत्त रिपोर्ट दी बी शुरूआत कीती। एह रिपोर्ट सरबंधी उद्योगें गी कार्बन रैहत बनाने पर केन्द्रित ऐ। उनें आखेआ जे एह रिपोर्ट ग्रीन स्टील गी लेइयै जानकारी हासल करने ते उद्योग दी लगातार पेशेवर माहिरें ते नीति निर्माताएं आस्तै सहायक होग।



## RNU Special Programme

आकाशवाणी जम्मू दा क्षेत्रीय समाचार एकांश 18 सितंबर, 2024 कोला त्रऊं गेड़ें च होने जा'रदे विधानसभा चुनाव 2024 दे सिलसिले च जम्मू संभाग दे सब्बने 10 जिले दे बारे च विशेष जिला प्रोफाइल कार्यक्रमें दी इक्क श्रृंखला शुरू करा'रदा ऐ। इस सिलसिले च 12 सितंबर थमा 15 मिनट दे 10 विशेष कार्यक्रम 12,14,16, 20, 22, 24, 26, 27, 28 ते 30 सितंबर गी बडले 8:45 बजे प्रसारित कीते जांगन जिंदे च जम्मू संभाग दे हर जिले दा ऐतिहासिक, पर्यटन ते राजनीतिक अवलोकन पेश कीता जाग स केंद्र शासित प्रदेश च आगामी विधानसभा चुनावें

दे महेनजर, शुरू कीती गेदी इस शृंखला दा उद्देश्य आकाशवाणी जम्मू दे श्रोताएं लेई जम्मू संभाग दे सब्बने 10 जिले दे हर इक्क विधानसभा क्षेत्र दे बारे च महत्वपूर्ण जानकारी प्रसारित करना ते उने गी जागरूक रखना ऐ । बने र'वो सहाडे कन्ने ते सुनदे र'वो आकाशवाणी समाचार

<><><><><><>

## **Toll Plaza GNSS**

शिड़क यातायात ते राष्ट्रीय जरनैली शिड़कें सरबंधी मंत्रालय नै जरनैली शिड़कें दे शुल्क-दर ते संग्रह सरबंधी नियम 2008 च संशोधन आस्तै इक अधिसूचना च आखेआ गेआ ऐ जे बत्त दस्सू ग्लोबल नैवीगेशन सैटलाइट सिस्टम जीएनएसएस जिने गड्डिडएं च होग उंदे आस्तै खास लेन बनाई जाग। एहदे च एह बी आखेआ गेआ ऐ जे जेकर कोई गड्डी जेह्डी जीएनएसएस आली नेई ऐ ओ इत्थें प्रवेश करदी ऐ तां उसी टोल प्लाजा पर तैह शुल्क दा 2 गुणा भुगतान करना होग। मंत्रालय नै आखेआ ऐ जे बगैर राष्ट्रीय परमिट आली गड्डिडएं दे चालक जां फही उंदे मालक राष्ट्रीय जरनैली शिड़क स्थाई पुल जां सुरंग दे इक हिस्से दा इस्तेमाल करदे न तां उनेंगी जीएनएसएस तैहत इक दिन च इक दिशा च 20 किलोमीटर तगर सफर करने पर कोई शुल्क नेई देना होग।

<><><><><><>

## **Doda SVEEP**

मतदाताएं च जागरूकता पैदा करने ते हर इक वोट दे महत्व बारे जागरूकता पैदा करने दे मकसद कन्नै स्वीप अभियान तैहत बन डोडा हाई स्कूल च इक कार्यक्रम दा सरिस्ता कीता गेआ। इस दरान केई गतिविधिएं दा आयोजन होआ ते आम लोकें गी मतदान दे हक्क बारे ते लोकतांत्रिक प्रक्रिया बारे जानकार बनाया गेआ। इस मौके पर बोलदे होई सीईओ दफतर डोडा च संस्कृति सरबंधी सीगे दी प्रभारी अनुराधा होरें आखेआ.

<><><><><><>

## **Kishtwar Election**

औंदे विधानसभा चुनाएं च सब्बने दी शमूलियत गी जकीनी बनाने लेई ओह मतदाता जेह्डे किश्तवाड़ जिले च ड्यूटी पर होंगन। उनें अज्ज डाक राएं वोट पाया ऐ। एहदे लेई डीसी दफतर च केन्द्र कायम कीते गे। एह सारा कम्म चुनां आयोग दे दिशा-निर्देश मूजब होआ ऐ। एह लोक 10 यानि अज्ज ते कल अपना मतदान करी सकदे न। 18 सितम्बर गी होने आले मतदान लेई तैनात तकरीबन 4 जहार 500 थमां बद्ध मतदाता न। आकाशवाणी समाचार कन्नै गल्ल करदे होई पाड्डर नागसैनी विधानसभा हल्के लेई रिटर्निंग अफसर डॉ. अनिल भगत होरें आखेआ.

<><><><><><>

## Reasi Home Voting

रियासी जिले च 85 ब'रे थमां बद्ध उमरी दे बजुर्गे ते दिव्यांग मतदाताएं लेई धरें थमां वोट पाने आली सहूलत 17 सितम्बर थमां शुरू होआ'रदी ऐ। इत्थें एह् दस्सना लाजमी ऐ जे रियासी जिले च 25 सितम्बर गी मतदान होना ऐ। इत्थें दुए गेड़ तैह्त वोट पाए जांगन। घरें थमां मतदान आली सुविधा भारतीय चुनां आयोग दी इक जबरदस्त पैहल ऐ। मतदान अमला जरूरी चीजें बस्ते ते समेयान कन्नै योग्य मतदाताएं दे घर भेजेआ जंदा ऐ तां जे मतदाता वोट पाने दे अपने अधिकार दा इस्तेमाल करी सकै। रियासी दे जिला चुनां अधिकारी विशेष महाजन होरें आखेआ।



## SVEEP Poonch

स्वीप टीम नै हाई स्कूल अजोत दे विद्यार्थिं कन्नै अजोत ग्रां च इक मतदाता जागरूकता रैली कड्डी। एह् दे मगरा स्वीप टीम नै हाई स्कूल अजोत च इक जागरूकता कार्यक्रम दा बी सरिस्ता कीता। जिंदे च वरिष्ठ नागरिकें, बूथ स्तरीय जागरूकता समूह साक्षरता क्लब यानि ईएलसी दे सदस्यें हिससा लैआ। पुंछ दी स्वीप टीम नै जागरूकता अणियान दी अगुवाई करदे होई सब्बनें तबकें दे मतदाताएं गी मतदान दे महत्व बारे ते चुनां प्रक्रिया बारे जानकारी दित्ती। आकाशवाणी समाचार कन्नै गल्लबात करदे होई स्वीप टीम दी सदस्य समायली शर्मा होरें आखेआ।



## Polling Training

चनैनी हल्के लेई होने आने विधानसभा चुनां लेई मतदान अमले गी सिखलाई दित्ती जा'रदी ऐ। एह् कम्म खीरी गेड़ च ऐ। केई सारे सरकारी कर्मचारी जेह्ड़े चुनां ड्यूटी लेई तैनात कीते गे न, इस सिखलाई कार्यक्रम च हिस्सा लै'रदे न। उधमपुर आले साढ़े जिला संवाददाता कन्नै गल्ल करदे होई रिटर्निंग अफसर गुरुदेव कुमार होरें आखेआ।

